

B. Nyarita

Molahkeun paguneman di handap jeung babaturan sakelompok!

Oléh-oléh

- Angga : “Paralay henteu?”
Intan : “Naon, Ga?”
Angga : “Katimus.”
Intan : “Katimus ti mana, Ga?”
Angga : “Ieu Uwa ngadamel nyalira.”
Intan : “Oh, ieu téh oléh-oléhna, nya? Cing, abdi ngaraosan.”
Angga : “Mangga. Sok wé nyandak!”
(Risma jeung Intan nyokot katimus hiji séwang. Bungkusna dibuka, tuluy didahar.)
Risma : “Amis, nya!”
Intan : “Muhun, amis pisan. Ari ieu dibungkusna ku naon, Ga?”
Angga : “Ku daun cau.”
Risma : “Di Cililin seueur katimus kitu?”
Angga : “Seueur. Nu mawi upami ka Cililin téh, abdi mah sok dibahanan katimus ku Wa Soléh. Saurna téh oléh-oléh ti Cililin.”
Risma : “Oléh-oléh ti Cililin mah wajit, nya. Tah, upami ti Sumedang mah oléh-oléhna téh tahu, anu katelah tahu Sumedang.”
Intan : “Upami ti Garut dodol, dodol Garut.”
Angga : “Muhun nya, ampir unggal daérah gaduh katuangan, anu sok dijadikeun oléh-oléh. Di Cianjur ogé aya, anu sok dianggo deungeun sangu téa geuning, dibotolan.”

Intan : "Oh, tauco atuh éta mah."
 Angga : "Tah, muhun tauco."
 Risma : "Ari ti Bandung naon oléh-oléhna?"
 Intan : "Aya ti Bandung mah peuyeum sareng oncom."
 Risma : "Aéh, muhun nya."
 Angga : "Tapi peuyeum mah di Purwakarta ogé aya, geuning sok ngagarantung di warung-warung sisi jalan."
 Intan : "Oh, peuyeum gantung!"
 Risma : "Ih, sanés peuyeum gantung, disebutna téh peuyeum Bendul, pédah anu gadamelna urang Bendul."
 Intan : "Ké, ah, abdi ogé upami ti Ciamis badé ngabantun galéndo, raos geura."
 Angga : "Naon galéndo téh?"
 Intan : "Galéndo téh dedek minyak kalapa. Éta ogé sok dianggo oléh-oléh ku nu ti Ciamis mah."
 Risma : "Seueur geuning nya katuangan oléh-oléh téh, aya ampir di unggal daerah."

a. Ngajawab Pananya

Jawab pananya di handap ku cara milih jawaban anu bener!

1. Anu ngalakukeun paguneman di luhur téh
 - a. duaan
 - b. tiluan
 - c. opatan
 - d. limaan
2. Ari anu mawa katimus nyaéta
 - a. Angga
 - b. Risma
 - c. Intan
 - d. Wa Soléh

3. Katimus téh kadaharan ti
 - a. DKI Jakarta
 - b. Jawa Barat
 - c. Bali
 - d. Kalimantan
4. Katimus téh dibungkusna ku
 - a. daun jagong
 - b. daun cau
 - c. daun kalapa
 - d. daun sampeu
5. Ari oléh-oléh ti Garut nyaéta
 - a. tahu
 - b. dodol
 - c. tauco
 - d. galéndo
6. Galéndo téh oléh-oléh ti
 - a. Cianjur
 - b. Bandung
 - c. Ciamis
 - d. Sumedang
7. Galéndo téh mangrupa dedek
 - a. minyak tanah
 - b. minyak kalapa
 - c. minyak seungit
 - d. minyak kayu putih
8. Oléh-oléh ti Bandung nyaéta
 - a. tahu jeung peuyeum
 - b. peuyeum jeug oncom
 - c. oncom jeung galéndo
 - d. mochi jeung tauco
9. Di Purwakarta ogé aya peuyeum, anu katelah
 - a. Peuyeum Bendul
 - b. Peuyeum Bandung
 - c. Peuyeum gantung
 - d. Peuyeum ketan

10. Peuyeum téh dijieunna tina
 - a. hui
 - b. kentang
 - c. sampeu
 - d. taleus
11. Di handap ieu kadaharan khas Garut iwal ti
 - a. dorokdok
 - b. burayot
 - c. dodol
 - d. wajit
12. Tauco dijieunna tina
 - a. kacang hejo
 - b. kacang kedele
 - c. kacang tanah
 - d. kacang panjang
13. Kumaha ari rasa katimus téh
 - a. amis
 - b. asin
 - c. haseum
 - d. pait
14. Saha anu ngabahanan Angga katimus téh
 - a. Ema
 - b. Bapa
 - c. Wa Soleh
 - d. Angga
15. Angga nawaran naon ka Risma jeung Intan téh
 - a. katimus
 - b. galéndo
 - c. peuyeum Bendul
 - d. tauco